

REZOLUTË
PËR VLERËSIMIN E PUNËS SË DEPARTAMENTIT TË ADMINISTRATËS PUBLIKE
PËR GJENDJEN NË SHËRBIMIN CIVIL PËR VITIN 2015

Kuvendi i Shqipërisë:

- Duke konsideruar reformën e administratës publike dhe zbatimin e plotë dhe efikas të legjislacionit të ri për shërbimin civil si një nga përparësitë dhe sfidat kryesore të shtetit shqiptar, për sigurimin e një administrate të pavarur, profesionale, të qëndrueshme, në përputhje me parimet e hapësirës administrative evropiane;

- Duke shprehur qëndrimin e tij se monitorimi i vazhdueshëm i zbatimit të ligjit dhe politikave që udhëheqin reformën në administratën publike është i domosdoshëm, përmes një sistemi efektiv, të unifikuar dhe sistematik të raportimit nga të gjitha institucionet e përfshira në zbatimin e reformës;

- Duke vlerësuar rolin e Departamentit të Administratës Publike si institucioni publik qendror përgjegjës për menaxhimin, mbikëqyrjen, zbatimin e ligjit nr. 152/2013, “Për nëpunësin civil”, i ndryshuar, si dhe në mbështetje të misionit të këtij departamenti për administrimin e një shërbimi civil bazuar në eficiencën, konkurrencën e lirë, meritën, transparencën dhe depolitizimin, sipas standardeve evropiane;

Kuvendi vlerëson:

1. Miratimin e Strategjisë Ndërsektoriale të Reformës në Administratën Publike 2015–2020 dhe planin e veprimit 2015–2017, në muajin prill 2015.

2. Rolin dhe angazhimin e Departamentit të Administratës Publike, në kuadër të zbatimit të reformës në administratën publike, si një ndër 5 prioritetet e qeverisë shqiptare, vlerësuar edhe nga Komisioni Evropian në Progresraportin 2015 për Shqipërinë.

3. Mban në vëmendje vlerësimet e Komisionerit për Mbikëqyrjen e Shërbimit Civil, në raportin vjetor për vitin 2015, lidhur me përmbajtjen e procesit të rekrutimit, si dhe përpjekjet për unifikimin e zbatimit të ligjit nga Departamenti i Administratës Publike.

Kuvendi konstaton se veprimtaria e Departamentit të Administratës Publike, gjatë vitit 2015, është përqendruar në një sërë procesesh të rëndësishme:

1. Fillimin e zbatimit të Strategjisë Ndër-sektoriale të Reformës së Administratës Publike;

2. Miratimin e akteve nënligjore në zbatim të ligjit nr. 178/2014, “Për disa ndryshime dhe shtesa në ligjin nr. 152/2013, “Për nëpunësin civil””;

3. Organizimin intensiv të veprimtarive trajnuese nga ASPA-ja, në përmbushje të detyrimeve që rrjedhin nga ligji nr. 152/2013, i ndryshuar, Strategjia Ndërsektoriale e Reformës në Administratën Publike, rritjen e kapaciteteve të administratës publike në përgjithësi dhe në menaxhimin e procesit të integritetit evropian;

5. Përmirësimin e sistemit *online* të mbledhjes së të dhënave për menaxhimin e burimeve njerëzore dhe shtrirjen e Sistemit Informatik të Menaxhimit të Burimeve Njerëzore, përfshirë modulën e pagave, për ministritë e linjës dhe Kryeministrinë;

6. Vijimin e procesit të rishikimit funksional dhe strukturor, për të gjitha ministritë e linjës dhe institucionet e varësisë, me qëllim ndërtimin e duhur strukturor të institucioneve;

7. Marrjen e masave për zbatimin e vendimeve gjyqësore të formës së prerë nga institucionet e administratës shtetërore të përfshira në fushën e zbatimit të ligjit;

8. Projekte dhe bashkëpunime me Komisionin Evropian, Këshillin e Evropës dhe donatorë të tjerë të rëndësishëm në mbështetje të reformës në shërbimin civil.

Kuvendi vëren se gjatë vitit 2015:

1. Ka një tregues të ulët në tërheqjen e kapaciteteve sasiore dhe cilësinë profesionale të kandidatëve për pozicionet e punës në shërbimin civil. Nga 1005 pozicione pune të shpallura vakante, u emëruan vetëm 602 nëpunës civilë;

2. Mobiliteti në shërbimin civil për të gjitha nivelet, është realizuar me 30 për qind të totalit të rekrutimeve, me 176 nëpunës me lëvizje paralele ose ngritje në detyrë brenda shërbimit civil;

3. Numri i masave disiplinore me largim nga shërbimi civil është ulur krahasuar me vitin 2014, duke aplikuar masa alternative;

4. Zbatimi i vendimeve gjyqësore të formës së prerë nga institucionet e administratës shtetërore është i ulët. Gjatë vitit 2015 janë ekzekutuar 24 nga 150 vendime të regjistruara.

Kuvendi kërkon nga Departamenti i Administratës Publike për vitin 2016:

1. Të sigurojë zbatimin e rekomandimeve të Raportprogresit për Shqipërinë për vitin 2015, në lidhje me prioritetin 1;



2. Të sigurojë zbatimin e planit të aktiviteteve afatmesme të Strategjisë Ndërsektoriale të Reformës në Administratën Publike, 2015–2020;

3. Të vazhdojë të tregojë transparencë në procesin e rekrutimit dhe largimit të nëpunësve, bazuar në merita, në të gjitha institucionet shtetërore, me qëllim krijimin e një administrate publike profesionale dhe të depolitizuar;

4. Të ndër marrë nisma sensibilizuese dhe stimuluese për studentët e sapodiplomuar për t'u bërë pjesë e administratës publike;

5. Të sigurojë shtrirjen e Sistemit Informatik të Menaxhimit të Burimeve Njerëzore në të gjitha institucionet e administratës shtetërore, pjesë e shërbimit civil, institucionet e pavarura dhe në të paktën 50 për qind të njësive të qeverisjes vendore;

6. Të sigurojë zhvillimin e kapaciteteve të administratës publike, nëpërmjet trajnimit të thelluar, rritjes së cilësisë së trajnimit, si dhe forcimit të kapaciteteve në fushën anti-korrupsion, konflikt interesi, hartim legjislacioni dhe përshtatje me *acquis*, si dhe të zhvillojë programe trajnimi, në përputhje me nevojat në administratën publike në nivel vendor;

7. Të garantojë raportimin e rregullt të emërimeve, lirimeve, masave disiplinore, gjendjes gjyqësore, dhe zbatimit të ligjit nr. 138/2015, “Për garantimin e integritetit të personave që zgjidhen, emërohen ose ushtrojnë funksione publike”, bazuar në *data base* të krijuara në çdo institucion të administratës shtetërore;

8. Të kryejë raportim periodik dhe raporte *ad-hoc*, si nga Departamenti i Administratës Publike dhe ministria përgjegjëse e tij, në Kuvendin e Shqipërisë, lidhur me çështje të caktuara të kërkuara gjatë ecurisë së zbatimit të reformës dhe strategjisë në administratën publike, si dhe mbi zbatimin e urdhrit nr. 5151, datë 28.10.2015, i ministrit të Shtetit për Inovacionin dhe Administratën Publike, “Për zbatimin e vendimeve gjyqësore të formës së prerë nga institucionet e administratës shtetërore të përfshira në fushën e zbatimit të ligjit për shërbimin civil”.

Miraturar në datën 21.4.2016

KRYETARI
Ilir Meta